

إِنَّ الدِّينَ عِنْدَ اللَّهِ الْإِسْلَامُ



لَا إِلَهَ إِلَّا اللَّهُ مُحَمَّدٌ رَّسُولُ اللَّهِ

# Khutba Jummah

HADHRAT MUHYI-UD-DIN AL-KHALIFATULLAH

*Munir Ahmad Azim*

02 Février 2018

(15 Jamad'ul Awwal 1439 AH)

Après ki li fine salué tous so bane disciples (et tous bane Musulmans) entier le monde avec le *Salaam* - la Salutation de paix dans l'Islam - Hazrat Khalifatullah (atba) fine lire Tashahhud, Ta'uz, Surah Al Fatiha, et ensuite li fine axé so Khutba lor: « *La Condition Humaine & Bane Remèdes* ».

## **SUPER-LUNE BLEUE DE SANG DE 31 JANVIER 2018**

Le monde fine témoigne ene signe céleste extraordinaire Mercredi le 31 Janvier 2018. Sa signe là c'est ene Super Lune Bleue de Sang. Ki été au juste sa super Lune bleue de sang? C'est la conjonction de trois particularités lunaires. Pour donne ene explication pli simple de sa, c'est kan le satellite naturel li à la fois relativement proche de la Terre (kot sa donne nous ene Super Lune), li le 2<sup>ème</sup> pleine Lune dans ene mois (Lune Bleue) et ena en même temps ene éclipse de la lune (Lune de Sang). Alors li ene super-lune combiné d'ene lune bleue et avec ene éclipse de la lune ki totale dans certains parties du monde et ki nous appelle sa aussi, ene lune de sang. Tous les trois phénomènes ti visibles seulement dans ene parties de la terre, en l'occurrence dans l'Amérique (après 152 ans) et bane pays de l'Asie et dans l'Australie etc. Mais couma dans l'Europe, couma la France etc., sa phénomène là, sa signe céleste là pas ti visible (mais ti visible en 1982). Mais ici à Maurice après 152 ans, nous fine témoigne li, mais seulement avec ene l'éclipse partielle de la lune ki fine durer quelques minutes seulement.

Sa phénomène là fine faire le monde causer, spéculer lors so signification. Ena pé dire la fin du monde proche et ki le Sauveur pou bizin paraite. Mais la vérité c'est ki nous pé déjà vivre bane jours de la fin du monde et ki le Sauveur ki zot tous pé attane déjà parmi zot. Kan zot trouve bane signes divines célestes coumsa, zot bizin fini conné, ki sa bane signes là li en support de la venue d'ene Messenger d'Allah. Sa signe là tellement rare et la façon ki li fine faire so l'apparition dans le monde montrer clairement ki bane prophécies ki fine mentionner dans bane l'Écritures Saints de plusieurs religions dans le monde et saki Allah fine enseigne nous dans le Quran Shareef, tous sa là li ene signe pou dimounes réfléchi et réforme zot conduite, et tous sa c'est bane signes ki pé fini manifester pou fer dimounes conné ki zot pé vivre bane jours de *Qayamat* et ki le Sauveur ki zot pé attane (sakaine dans so l'époque ziska le Jour du Jugement dernier) fini arriver parmi zot. Li vrai ki dans ene Hadith Hazrat Muhammad (saws) fine dire ki eclipse pas arriver pou annonce naissance ou la mort d'aucaine de bane dimounes. Mais li fine aussi dire ki pour l'arrivée du Messie Promis pou ena 2 éclipses, lunaire et solaire dans ene même mois de Ramadhan et saki fine arriver, ki li dans l'époque de Hazrat Massih Ma'oud Mirza Ghulam Ahmad (as) et aussi dans l'époque de sa humble serviteur là, le Khalifatullah. Sa signe céleste de Super Lune Bleue de Sang ti paraite aussi dans l'époque de Hazrat Massih Ma'oud (as) quelques années avant so proclamation. Alors tous sa c'est bel et bien bane signes annonçant bane événements terribles ki pou sakouye le monde, surtout si bane dimounes pas reconnaite l'Élu d'Allah et zot reste oublier Allah, et associer les autres avec Li.

### **183 ANS ABOLITION L'ESCLAVAGE**

Et hier couma zot tout conner, ti ene conger publique et sa marque 183 ans dépi l'abolition de l'esclavage. Longtemps nous bane grands dimounes ti bizin faire face bane grand grands difficultés, et bane épreuves, kot zot droits, bane droits humains ti pé bafoué. C'est dans bane l'années 1800s ki bane pays dans le monde fine commence, ene par ene abolir l'esclavage, mais guette ki kalité grand l'islam grand, ki depuis 7<sup>ème</sup> siècle même, dans l'Arabie, avec l'arrivée du plus grand prophète ki le monde zamais fine connu auparavant et ki zamais pou conner (ene tel prophète de so calibre) dans le future, ki bane commandements divines fine déssane pou montrer l'humanité couma pou abolir l'esclavage petit à petit. Sa pas vers l'abolition de l'esclavage là à sa l'époque là ti grandiose parski bane esclaves ti traité couma bane zanimo et avec l'arrivée de Nabi Kareem Hazrat Muhammad (saws), bane esclaves, ki ti considérer couma bane derniers dimounes sur terre fine retrouve zot bane droits, bane droits humains, et kot Allah dans Quran et aussi à travers l'exemple de So prophète (saws) fine ouvert la porte à

l'émancipation de bane esclaves kot zot retrouve zot dignité de dimounes et zot retrouve zot liberté. *Alhamdulillah, Summa Alhamdulillah.* Nous bizin remercier Allah ki Li fine faire nous né comme musulman et avec tous nous bane droits humains. En vérité, nous bien chanceux kan nous pense ki bane dimounes avant, dans le passé, ki kalité misère noire zot fine bizin passé kan ti pé cokain zot, et force zot pou vine esclave et déracine zot de zot pays pou alle travaille couma zanimò dans bane les autres pays. Ki Allah gagne pitié de tous sa bane dimounes ki fine vivre dans sa bane conditions là, et ki Allah récompense zot pour tous bane sacrifices et patience ki zot fine prend dans sa bane situation difficile là. *Ameen.*

### **LA CONDITION HUMAINE & BANE REMEDES**

Le monde pé développer à ene trop grand vitesse ki renversant et bouleversant et ki faire gagne vertize. Li pé modernisé sans arrêt, kot li pé vine pli tipti, et kot avant kan li ti pé paraîte trop grand, astaire là, li pé vine pli tipti dans le sens ki avec la globalisation et bane technologies ki nous ena astaire, li couma dire ene la table rond kot tous bane dimounes dans le monde capave réuni et communiquer et partaaze zot bane l'idées et zot la vies. Mais avec la course au pouvoir et à la richesse, bane riches pé vine pli riche encore, et bane pauvres pé vine pli pauvre encore, dans ene façon bien lamentable. Et le monde pé contigner exister ziska ki l'Unique Créateur - Allah - décide autrement.

Riche ou pauvre, sakaine essaye vivre à so façon. Mais commié parmi nous réaliser saki la santé, bane loisirs, bane manzé-boire, et la tranquillité coûte à bane habitants d'ene pays ? Mais surtout commié pé accorde impé zot lé temps précieux pour pense au Créateur à travers la prière? Bane riches pas ena presque aucaine tracas (de côté financier) afin pou amène zot la vie dans ene façon tranquille. Bane pauvres, par contre, bizin travaille pli dure encore afin pou essaye zoine deux boutes. Sa classe (ou section) de population là, de n'importe ki pays pou reste toujours dans la pauvreté avec so bane plusieurs problèmes, couma - la famine, maladie, problème logement, chômage.

Malgré tous sa là, bane dimounes, quelle que soit zot situation, zot pé vive. Du moins, zot pé essaye vive. Peut-être ki certains souhaite la mort si tant zot pé crazé par la pauvreté et par bane malheurs. Mais la vie ou la mort pas dépanne de nous. C'est zis Allah Ta'ala ki décide de sa.

Mais alors, ki faire ena tant de tracas, tant de malheurs ?... Eski alors Allah Ta'ala, l'Unique Créateur, Qui conne et contrôle tout, pas content nous ? Eski Li pas

apprécier nous mode de vie, nous façon de faire? Pas vraiment, d'après ene Hadith de nous bien-aimé prophète Hazrat Muhammad (saws)! C'est plutôt ki nous, bane humains, surtout bane ki forme partie de l'*Ummah* de Hazrat Muhammad (saws), nous oublier trop vite nous bane obligations envers le Créateur. Alors, tout basculer. Kan situation tourne enba là-haut, la vie déstabiliser. Le stress, l'angoisse, la colère, l'anxiété (tracas), le doute prend place.

Alors ki faire la plus grande majorité de la population mondiale vive dans la pauvreté et zis ene ti pourcentage - bien minime même - zot riche à l'extrême, et zot contrôle tout sa ki trouver dans sa lé monde ici-bas là? Certains d'entre zot senti zot tellement puissants à cause zot fortune ki zot ena, ki zot prend zot couma bane demi-dieux. Mais mette sa bien dans zot la tête. Riches ou pauvres, nous tout vive toujours dans la même crainte, même l'angoisse, même frayeur.

Nous pé vive aujourd'hui dans 21<sup>ème</sup> siècle, ene l'époque de confusion kot l'esprit matérialiste primé partout, y compris au sein de l'*Ummah*. Le confort matériel li utile pour nous zis dans sa lé monde ici-bas là. Ki nous fine préparer pour l'au-delà? Eski nous pé prépare nous bien, couma bizin dans sa but là? Dans sa lé monde temporaire là, ena ene confusion totale; tout dimounes abriti et zot tellement confu kot sa amène zot vers bane kitchoses blessant, kot zot lécoeurs blésser et casser, et sa arriver kan zot l'âme fine vine fragile.

Pou rende nous compte de sa, nous nek ena pou suivre bane informations de côté la santé, de côté médicale. Bane scientifiques zot nek produire bane médicaments de toutes sortes pour combattre le stress - sa maladie du monde moderne ki affecter tout dimounes, et zot fabrique sa bane médicaments là pour combattre l'anxiété, la colère, la nervosité etc. Bane médicaments ki prescrits et ki servi à forte dose zot ena parfois bane l'effets secondaires. Alors situation là empirer. Ki li riche ou pauvre, ki li alle faire li soigner dans clinique privée ou à l'hôpital public, ene patient pas recevoir bonheur ki li souhaiter gagner ou bien si arriver li gagne li, li bien minime et li pas durable. Alors ki dimoune faire alors? Zot préfère tourne vers bane traitements diaboliques, sataniques - zot alle guette bane docteurs sans souliers - kot alors zot situation pli empirer encore. Au lieu de sa mauvais décision ki zot fine prend là, ti ena ene seul remède efficace ki ti ena; pas zis efficace, bien efficace même, et ki offert gratuitement à zot mais li ene telle remède ki dimounes souvent négliger, oublier et mette à l'écart. Sa remède là c'est : ene **APPEL À ALLAH TA'ALA.**

Oui, nous bizin tourne vers Li tousel, Le Sauveur, Celui ki donne nous, nous guérison, nous Protecteur, Le Miséricordieux. Li accorde nous tous bane remèdes. Sans ki Li prend kit paiement avec nous. Sans ki nous bizin prend kit rendez-vous avec Li. Li demande nous nek ene sel kitchose: ki nous bizin pense Li à tout moment. Li là pou écoute nous. Tous saki nous, bane malades ena pou faire, c'est ki nous bizin ena ene la foi et ene piété sans réserve. Nous bizin croire dans LI, dans So bane remèdes, dans So bane miracles. Eski nous prêts pou faire sa ?

Nous bizin prépare nous et faire nous vine prêt pou sa. Nous bizin faire confiance à nous Créateur. Sans le moindre doute. Sans réserve. Nous bizin réaliser ki nous, bane humains, parmi tous bane créatures ki exister, c'est nous ki plus chanceux, pli fortuné. Parski Allah Ta'ala fine accorde nous tout saki nous bizin, gratuitement. C'est à nous pou servi sa avec beaucoup l'attention, avec modération, avec modestie. Bane meilleurs di biens, bane meilleurs l'emplois, pli haute sécurité ki exister fine réserver zis pour la race humaine. Alors l'homme (bane dimounes) faudé pas plainné de quoi que ce soit parski fine donne li tout (couma nous dire, li fine gagne tout lor plateau!). L'accessibilité à sa bane dibiens là li sans limite.

Malgré tout sa, l'âme de l'être humain li zamais tranquille. Sa l'âme là li toujours angoissée, effrayée, sans tranquillité. So l'âme souffert; so le corps pas ena repos, pas ena confort, péna sommeil, et tranquillité. Lé corps là li privé de la joie, de bonheur, de gaieté. Tout vine parfaitement noir dans la vie au quotidien. Pas ena aucaine tranquillité. Li couma dire ene embarcation sans gouvernail (sans centre de contrôle) ki à la merci de bane vagues énormes. Tout capave arriver. Parfois, pour le pire. Nous (bane dimounes) nous senti nous abandonnés. Et pourtant... Li (l'homme) fine servi tous bane ressources matérielles. Sans résultat positif. L'homme alors abandonner; li perdi courage, li rende patente. Li désesparé, découragé... mais face à de telles situations, n'importe ki musulman ena bane remèdes (bien solide, bien efficace). C'est : **ALLAH... ALLAH... ALLAH... ZIS ALLAH!**

Sakaine de nous de l'*Ummah*, kan nous arrive au bord du précipice (kot nous penser pas ena aucaine solution et ki nous au bord du désespoir), alors faudé pas nous laisse nous décourager. Sakaine parmi nous ki trouve dans l'*Ummah* bizin reprend so courage en main, so la force en main et li bizin tourne vers so Créateur... so Créateur Unique. C'est zis Li tousel ki nous Sauveur, nous Protecteur, nous Bienfaiteur. C'est zis Li tousel nous Unique Support. Zis Li tousel ki comprend l'homme - la race humaine - de la tête aux pieds. Li normal, après

tout, parski eski c'est pas Li ki fine créer nous, eski c'est pas Li ki fine fabrique l'homme? C'est Li ki fine modelé li (l'homme), fine donne li ene souffle (ki vine de Li). C'est Li ki fine donne l'homme la force, le courage, l'esprit pour faire la différence entre le bien et le mal. Li conne à la perfection l'état d'esprit de l'homme et couma li fonctionner, parski c'est Li-même l'Unique Créateur de l'homme. Li conne la douleur, le désespoir, le chagrin, la joie de sakaine de bane êtres humains à travers le monde. Li ena ene registre pour sakaine de nous tous ici-bas. Alors, ki faire l'homme alors tourne vers bane kitchoses ki pas bizin, couma bane arnaqueurs (bane dimounes ki pou cokain zot) alors ki le remède de sak problème li trouve dans le chemin d'Allah Ta'ala ?

Là (avec Allah, dans le chemin d'Allah), pas ena aucaine désespoir, aucaine danger, aucaine dépenses inutiles. Oui, ena dépense pour faire. Ki sa dépense là sa? C'est ki ene dimoune li bizin dépense tout so l'énergie pou gagne la grâce d'Allah Ta'ala. Et alors c'est sa, la réalité de la vie. **« Eski c'est pas en pensant à Allah ki les cœurs trouve tranquillité? »** (Ar-Raad 13: 29).

L'Islam li la religion ki pli parfait, ki le Créateur pli content. Pas ena aucaine l'idolâtrie ni bane la lois ki encourage bane mauvais critiques ou bane rites insignifiants dans l'Islam. Nous bane musulmans. Nous devoir sacré c'est ki nous bizin croire dans ene Dieu Unique, ki nous bizin tourne vers Li à tout moment, pou adore sans réserve. Ni plus ni moins. Et Allah Ta'ala, rempli de bonté, de miséricorde, rempli d'ene sagesse infinie, zamais pas fine abandonne So bane serviteurs, So bane sujets. Surtout bane ki trouve dans l'*Ummah* (de Hazrat Muhammad (saws)). Même si, par négligence, par paresse, par insouciance, nous oublier Li, nous abandonne Li! A cause sa l'amour ki Allah ena pour nous là, Li fine arme nous de bane différents moyens bien efficaces, bien puissants même (afin ki nous retrouve nous chemin, afin ki nous pas alle à la dérive). Parmi, ena le Saint Coran et la *Sunnah* du Saint Prophète (saws). Sa c'est bane faveurs divines ki fine surtout accordé à l'*Ummah*. Nous, bane dimounes, bane musulmans de l'*Ummah*, eski nous conscients de tout sa bane faveurs ki Allah fine fer lors nous là? Eski nous conner couma pou servi tous sa bane moyens là dans ene façon efficace et avec sagesse afin ki nous gagne la tranquillité dans nous *Imaan*, dans nous piété, dans nous l'âme et même nous lécorps?

Le Quran Shareef li ene guide pour l'humanité en entier. La *Sunnah* constituer en quelque sorte ene explication et une mise en application de sa guide là.

L'Islam prône d'abord l'établissement d'ene lien étroit et infallible de l'homme avec so Créateur Allah Ta'ala. Et sa lien là bizin durer éternellement parski c'est là ki ena la tranquillité, sa remède pou tous bane problèmes mental là. C'est bien sa lien là ki pou protège sa élément de l'*Ummah* là contre tout malheur ki pou arrive li ici-bas. Alors ki tout dimoune mette sa bien dans zot l'esprit, nous tout ki trouve dans l'*Ummah* de Hazrat Muhammad (saws): C'est Allah Ta'ala ki apporte la stabilité nécessaire ki sakaine d'entre nous bizin kan nous ena bane problèmes pou résoudre ou kan nous faire face bane difficultés...

Si nous dissocié nous de sa lien divine là et nous permette nous pou croire ki nous pou capave résoudre nous problème en faisant appel à bane les autres dimoune ou kitchoses, alors si arriver ene musulman prend chemin travers et alle tape la porte de tous bane créatures ou kitchoses au lieu d'Allah, alors sa musulman là li perdi l'essence même de so la foi (*Imaan*). Et donc, sans sa la foi là, ki valeur sa musulman ena? Li vine seulement ene musulman que de nom seulement!

Donc, nous bizin faire le tout pour le tout pour rapproche nous avec Allah, parski c'est Li tousel la Source de nous tranquillité. Si nous oulé vive dans la tranquillité, même pendant ki nous pé faire face bane épreuves, c'est en plaçant nous confiance en Li tousel, nous Créateur ki nous pou capave réussi et nous pou ouvert pour nous la porte de la sérénité intérieur et nous pou attire lors nous le plaisir d'Allah. *Insha-Allah, Ameen.*